

SAKSFRAMLEGG

Sakshandsamar: Inger Moe
Arkivsaksnr.: 17/504

Arkiv: K12 &30

Forvaltningsplan for Ytamo naturreservat, framlegging til høyring

Rådmannen si tilråding:

Forvaltningsplan for Ytamo naturreservat vert lagt ut til offentleg ettersyn slik han ligg føre.
Høyringsfristen vert sett til 15. juni 2017.

Saksutgreiing:

- Dokument til saka:** Framlegg til forvaltningsplan for Ytamo naturreservat datert 23.03.2017.
- Uprenta vedlegg:** Merknad frå Gaupne grunneigarlag dat. 15.03.2017 er å finna på arkivsak 17/504.

Samandrag:

Forvaltningsplanen for Ytamo naturreservat er klar til å leggjast ut til høyring. Undervegs i arbeidet med planen har det vore gjennomført synfaring og ope møte, og det har særleg vore lagt vekt på å leggja til rette for eit konstruktivt samarbeid med grunneigarane.

Nyleg vart Åsmo innlemma i naturreservatet, difor er ikkje alle kart i planframlegget rette. Lesaren vert gjort merksam på dette gjennom infoboksar i dei karta det gjeld.

Rådmannen meiner at utkastet no elles er tilstrekkeleg gjennomarbeida til å leggjast ut til høyring. Høyringsperioden er føreslegen fram til 15. juni 2017.

Utval som har vedtaksmynde:

Kommunestyret skal handsama planen etter høyringa før endeleg godkjenning av Fylkesmannen i Sogn og Fjordane. Plan- og forvaltningsstyret tilrår saka for kommunestyret.

Fakta og vurdering:

Ytamo naturreservat vart verna i 2009 med bakgrunn i Verneplan for edellauvskog i Sogn og Fjordane fylke. Føremålet med vernet er å ta vare på eit større tilnærma urørt skogsområde med spesielle naturtypar, med heile mangfaldet av artar og vegetasjonstypar og alle naturlege økologiske prosessar. Referanseverdien og den vitskapelege og pedagogiske verdien til området er òg vektlagt.

I verneområdet er det brukarinteresser knytt til jordbruk, skogbruk, jakt og fiske, friluftsliv, sikring av tilkomst og vedlikehald av vegar og bruver, samt forsking og undervisning. Desse brukarinteressene er gjennomgått i planen, og det er sett ned retningslinjer og reglar for bruken av området.

Fylkesmannen i Sogn og Fjordane hadde forvaltningsansvaret fram til 1. juni 2015, då Luster kommune overtok. Dette inneber mellom anna ansvar for å handsama søknader om dispensasjon frå verneforskrifta, samt informasjon, skjøtsel og tilrettelegging. Statens Naturoppsyn (SNO) har som oppgåve å føra tilsyn med verneområdet og hjelpe til med tiltak for å sikra og fremja verneverdiene.

Arbeidet med forvaltningsplanen starta hausten 2012, samstundes med forvaltningsplanar for fem andre verneområde som kommunen har ansvar for. Eit utkast vart først utarbeida av Aurland Naturverkstad i samarbeid med naturforvaltaren i Luster. Prosessen har så langt omfatta både ope møte og synfaring for å få fram relevante problemstillingar, samt dialog med grunneigarlaga undervegs. Det har særleg vore lagt vekt på å leggja til rette for eit konstruktivt samarbeid med Gaupne grunneigarlag, som har vore kritiske til verneprosessen og erstatningssaka. Difor har også laget fått høve til å uttala seg om planen påførehand. At planen først no er høyringsklar har med å gjera prioriteringar og ressurstilgang i kommunen, samt at ein har venta på vedtak om utviding av verneområdet med Åsmoterrassen.

Forvaltningsmål for dei neste 10 åra

Måla i planen er sette opp som «forvaltningsmål», som er overordna målsetnader hovudsakleg direkte knytte til føremålsparagrafen i verneforskrifta. Det er vektlagd å ta vare på mangfaldet både for naturen sin eigen del og som referanseområde, studieområde og for opplevingsverdien si skuld. Innplanta gran som spreier seg vidare innover i reservatet er ei utfordring reservatet deler med dei fleste naturreservat på Vestlandet.

Meir detaljerte mål, såkalla bevaringsmål, skal ikkje formulerast i planen, men leggjast inn i NatStat, som er eit eige system som Miljødirektoratet har utarbeidd til føremålet.

Vanlege forvaltningsoppgåver som informasjon, tilrettelegging og rydding er derimot med i denne forvaltningsplanen.

Involvering og vidare prosess

For å sikra at interessentar får kjennskap til innhaldet i planen og høve til å koma med innspel, vert planen send ut til grunneigarane, organisasjonar og andre. Synfaringar og møte vert gjennomført ved behov i høyringstida.

Høyringsperioden er føreslegen frå vedtaksdato til 15. juni.

Når innspela er gjennomgått og innarbeidde, skal planen handsamast av kommunestyret før han vert send til fylkesmannen for endeleg godkjenning.

Dato: 27.03.17

Jarle Skartun
rådmann

Steinulf Skjerdal
Landbruksjef

Særutskrift skal sendast:
m/kopi til: